

Morning Dogri (NSD) Bulletin 30-March-2026

आकाशवाणी

खास-खास खबरां:-

1. तमिलनाडू ते पच्छिम बंगाल दे असैम्बली चुनाएं लेई नामज़दगियां भरनें दी प्रक्रिया अज्जै थमां शुरु होआ करदी ऐ।
2. भारती चुनांs आयोग नै पच्छिम बंगाल च 170 पुलस थानें दे प्रभारी अफसरें गी हटाइयै राज्य च बड्डा फेरबलद कीता ऐ।
3. प्रधानमंत्री ते भारती जनता पार्टी दे वरिष्ठ नेता नरेन्द्र मोदी अज्ज असम ते पुदुचेरी दे पार्टी कार्यकर्ताएं गी सम्बोधित करगंन।
4. सरकारै मुख्यै दे 21एं राज्यें ते केन्द्र शासत प्रदेशें च बधिया किस्मै दे मिट्टी दे तेल दी बंड दी मंजूरी आली अधिसूचना जारी कीती दिती ऐ।
5. भारत दे दंऊ होर एल.पी.जी टैंकर 94 जहार टन एल.पी.जी दे कन्नै स्वदेश परतोआ करदे न। इ'नें टैंकरें जंग दी मारै हेठ आए दे होमुर्ज जल डमरु मध्य गी सुरक्षित पार करी लैता ऐ।
6. आई.पी.एल 2026 दे कल वानखेड़े स्टेडियम च खेड्डे गेदे दुए मैच च Mumbai Indians नै कोलकाता Knight Riders गी 6एं विकटें कन्नै हराई दिता ऐ।



EC- Notification

तमिनाडू ते पच्छिम बंगाल विधानसभआ चुनांs दे पैहले गेड लेई अधिसूचना जारी होने कन्नै नामांकन दाखल करने दी प्रक्रिया अज्जै थवां शुरु होई जाग। तमिलनाडू च 234 विधानसभा हलके लेई 23 अप्रैल गी इक्कै गेड च मतदान होग। तमिनाडू च नामांकन

भरने दी प्रक्रिया 6 अप्रैल गी खत्म होई जाग। नामांकन पत्रें दी जांच अगले दिन किती जाग ते मेदवार जेकर चाहन तां फही 9 अप्रैल तगर अपना नामांकन पताई सकदे न।



WB -Officers Removed

पच्छिम बंगाल च इक बड्डे प्रशासनिक फेरबदल तैहत चुना आयोग नै राज्य दे 170 पुलस थाने दे प्रभारी अफसरें गी हटाई दिता ऐ। इन्दे च भवानीपुर ते नंदीग्राम जनेह महत्वपूर्ण विधानसभा क्षेत्र बी शामिल न। मुख चुनां अधिकारी हुंदे विभाग दी सिफारशें दे आधार पर आयोग नै 11 बड्डे ओहदें पर काबज अफसरें सनें कुल 184 पुलस अधिकारियें दे तबादले ते तैनाती गी मंजूरी दिती ऐ। एह फेरबदल उत्तर थवां दक्खन बंगाल तगर पूरे राज्य च कीता गेआ। इसदे कन्नै कूच बिहार- अलीपुरद्वार-मालदा- मुर्शिदाबाद- उत्तर ते दक्खन 24 परगना-हावड़ा- हुगली ते पूर्वी ते पच्छमी मिदमापुर जनेह जिले प्रभावित होए हे।



PM -Mera Both Sabse Mazboot

प्रधानमंत्री ते भारतीय जनता पार्टी दे वरिष्ठ नेता नरेन्द्र मोदी होर अज्ज नमो ऐप्प राएं “मेरा बूथ सबसे मज़बूत” संवाद तैहत असम ते पुद्दुचेरी दे पार्टी कारजक्रताएं गी सम्बोधित करडन। सोशल मीडिया दी इक पोस्ट च मोदी होरें आखेआ जे पिच्छले इक दहाके च असम दी प्रगति सब्बनें दे सामने ऐ ते राज्य बक्ख-बक्ख क्षेत्रें च विकास दी टकोदी उपलब्धियें आस्तै जानेआ जंदा ऐ। उंनें अग्गे आखेआ जे विकास कम्मो करी

लोक- डबल इंजन आहली NDA सरकार दे अगले 5एं बरे आस्तै पूरी चाल्ली तयार ना।
इक होर पोस्ट च मोदी होरें आखेआ जे डबल इंजन आहली NDA सरकार नै पिच्छले
5 बरे च पुद्दुचेरी दे लोकेँ दियें आसेँ-तांगे गी पूरा कीता ऐ। उ'नेँ पुद्दुचेरी दे पार्टी
कारजकर्ताएं कन्नेँ संवाद गी लेइयै उत्साह बी जाहिर कीता।



Parliament Today

लोकसभा च अज्ज दिवालिये ते दिवालियेपन सरबन्धी संहिता (संशोधन) बिल 2025 पर
चर्चा होग। इस बिल दा मकसद दिवालिये ते दिवालियेपन सरबन्धी संहिता बिल-2016
च संशोधन करना ऐ। एहदा लक्ष्य कम्पियें ते व्यक्तियें बशकार प्रक्रियाएं सरबन्धी चिर
ते व्याख्या सरबन्धी मुद्देँ दा हल कड्डना ऐ। सदन च देशै गी वामपंथी उग्रवाद थमां
मुक्त करने दे जतनेँ पर बी चर्चा होग। राज्यसभा च केन्द्री थेहारबंद पुलस बल
(सामान्य प्रशासन) विधेयक-2026 पर चर्चा ते उसी पास करने दा बी कार्यक्रम ऐ। इस
बिल दा मकसद केन्द्री थेहारबंद पुलस बलेँ च ग्रुप-ए जनरल ड्यूटी अधिकारियें ते
होरनेँ अधिकारियें दी भर्थी ते सेवा शर्तेँ गी नियंत्रित करने आले आम नियमें गी
विनियमित करना ऐ।



Afgan -Pakistan War

अफगानिस्तान नै पाकिस्तान दी फौज पर कुनार प्रांत दे असदाबाद दे बाहरले इलाकेँ
च गोलाबारी दा आरोप लाया ऐ। इस हमले च इक व्यक्ति दी मौत होई गई जिसले के

16 जनं ज़ख्मी होई गे न। जख्मियें च मती सारी महिलां ते बच्चे शामिल न। एह ताज़ा घटना अफगानिस्तान ते पाकिस्तान बश्कार जारी बन्ने पार आली झड़प्फें ते ब्हाई हमलें दे दरम्यान होई ऐ। एह संघर्ष जंदे फरवरी म्हीने तंदु शुरु होआ हा- जेल्लै पाकिस्तान आसेआ अफगानिस्तान दे बन्ने आले इलाकें च कीते गेदे ब्हाई हमलें दे परते च अफगानिस्तान ने बन्ने पार फौजी कार्रवाई कीती ही।

<><><><><><>

Govt.- Kerosene Notification

सरकार नै इक राजपत्र अधिसूचना जारी करियै 21 राज्यें ते केन्द्र शासित प्रदेशों च सार्वजनिक बंड प्रणाली तैहत उच्च गुणवत्ता आहले मिट्टी दे तेल दे बंड दी इजाजत दिती ऐ। एह फैसला दुनिया भरै च ऊर्जा आपूर्ति गी प्रभावित करारदी भू-राजनीतिक परिस्थितिएं गी ध्यान च रखदे होई लैता गेआ ऐ। एदा मकसद उ'नें क्षेत्रें च रुट्टी पकाने ते सरबंधत बवस्था दी जरूरतें गी पूरा करना ऐ- जित्थे सामान्य परिस्थितियें च मिट्टी दे तेल दा इस्तेमाल बंद करी दिता गेआ। इस अधिसूचना मुजब हर जिले च सार्वजनिक क्षेत्र दी तेल कम्पनियें दे मालकी आहले बद्दोबद्द 2 ईंधन स्टेशन 5 ज्हार लीटर तगर केरोसिन दा भंडार करी सकदे न। एह अधिसूचना फौरी प्रभाव कन्नै लागू होई गेई ऐ ते 60एं दिनें तगर यां अगले आदेश तगर वैध रहौग।

<><><><><><>

LPG Tankers

भारत दे दंडु होर LPG टैंकर 94 ज्हार टन LPG दे कन्नै स्वदेश परतोतआ करदे न। इनें दौनें टैंकरें जंग दी मारे हेठ आए दे होमुर्ज जल डमरु मध्य गी सुरक्षित पार करी

लैता ऐ। इक LPG टैंकर BW-TYK कल मुम्बई पुज्जी सकदा ऐ जिसले के दुए टैंकर BW-ILM दे पैहली अप्रैल गी न्यू मेंगलोर पुज्जने दी मेद ऐ। अमरीका ते इज़ाराईल आसेआ ईरान पर कीते गेदे हमलें ते तेहरान दी व्यापक जवाबी कार्रवाई करी होमुर्ज़ जल डमरु मध्य थमां ज्हाजें दी आओ-जाई लगभग ठप्प होई गई ही। एह तंग जलमार्ग- खाड़ी देशें थमां दुनिया भरै च तेल ते गैस दे निर्यात दा प्रमुख रस्ता ऐ। एहदे शा पैहले भारत दे 4 LPG टैंकर सुरक्षित तरीके कन्नै इस रस्ते थमां लंग्घी चुके दे न।

<><><><><><>

West Asia-Iran US

पच्छिम एशिया च जारी तनाव दे चलदे ईरान दे संसद अध्यक्ष मोहम्मद Bagher Qalibaf होरें अमरीका पर गुप्त रूप कन्नै जमीनी सैन्य कार्रवाई दी योजना बनाने दा आरोप लाया ऐ। उ'नें आखेआ जे जेकर अमरीकी सैनिक ईरान च दाखल हुंदे न तां ईरानी सेना जवाबी कार्रवाई आस्तै पूरी चाली त्यार ऐ। उ'नें राश्ट्रीय एकता दा आहवान करदे होई आखेआ जे संघर्ष हुन बड़ी गै नाजुक स्थिति च पुज्जी गेआ ऐ।

<><><><><><>

IPL

आई.पी.एल क्रिकेट च मुम्बई इंडियंस नै कल रातीं मुम्बई दे वानखेड़े स्टेडियम च खेड़े गेदे दुए मैच च कोलकाता नाइट राइडर्स गी 6एं विकटें कन्नै हराई दिता। पैहले बल्लेबाजी करदे होई कोलकाता नाइट राइडर्स ने कप्तान अजिंक्य रहाणे दे 67 ते

अंगकृष रघुवंशी दे 51 रन्जें दे बदौलत 220 रन्जें दा बड्डा स्कोर बनाया। एहदे परते च Mumbai Indians ने रोहित शर्मा दे 78 ते रयान रिकेल्टन दे 81 रन्जें दी बदौलत 19 ओवरें ते इक गेंद च 4 विकटें दे नुकसान पर लक्ष्य हासल करी लैता। Mumbai Indians दे गेंदबाज़ शार्दुल ठाकुर गी 3 विकटां लैने लेई Man of the Match चुनेआ गोआ। IPL च अज्ज राजस्थान रॉयलस ते Chennai Super Kings आमने-सामने होडन। एह मैच गुवाहाटी दे बारसापारा क्रिकेट स्टेडियम च अज्ज संजा 7 बज्जियै 30एं मिन्टें पर शुरु होग।

<><><><><><>

Weather

मौसम विभाग नै दिल्ली- चंडीगढ़- हरियाणा- पूर्वी राजस्थान- हिमाचल प्रदेश- मध्य महाराष्ट्र ते पंजाब च अज्ज ऐन-गड़ा पौने दी पेशगोई कीती ऐ। तोंआई मराठवाड़ा ते पच्छमी मध्य प्रदेश च बी ऐसी गै स्थिति बनी रौहने दी संभावना जताई गई ऐ। इसदे कन्नै जम्मू-कश्मीर- लद्दाख-असम- मेघालय- नागालैंड- मणिपुर- मिजोरम ते त्रिपुरा च अज्ज किश थाहरें पर लगातार बरखा पौने दी संभावना ऐ। एदे कन्नै गै अगले 2 दिनें च अरुणाचल प्रदेश- केरल ते माहे च बिजली मिलकने दी संभावना ऐ।

<><><><><><>